

# **Pol ile malueng ako i wat i a Taitus nge**

## **Taitus**

### **Ritetong nge a Taitus**

Pol i pamenu a Taitus a mtho a Krit, mo i voth nge mo i theal total toko lemioongare na i pavengveng ole lotu. (O thopola 1 Timoti a ritetong.) Krit angare o oma vothung ako i kerenga rintet, mako Pol i ri pompom nge vothung sivenga ako aro toko lemioongare tomo nge lotu a mukalingare aro o panes i. (2:2-13; 3:1-3) Taitus 1:6-9 na Timoti 3:1-12 o ritet it nge toko le vanga o pavurvur ako aro o velpol ini lotu a mukalingare. Pol i tor a Taitus ile ve aro i vol pamirealonga le apaltetongare. (1:5; 1:10-16; 2:1; 2:7-8; 2:15; 3:9-11) I sivenga ako aro lotu a mukalingare aro o el senu mire nge a 1 Timoti, 2 Timoti na Taitus mo aro o pavurvur nge toko lemioongare othealnga na lotuong ile thoing.

---

### **Taitus aro i paengeng toko lemioongare ako o voth a mtho a Krit ole lemioong, naro i pavengveng mun ole vothung**

*(Vonge 1:1-3:15)*

**1** <sup>1</sup>Tho a Pol, tho ini a God ile toko umonga, na Jisas Krais ile pakeke. Na God i ategal tho ve aro tho pamireal tokokoe areko God i ategal or lale ve aro or ini ile, mo olemio nge i. Na i ategal mun tho ve aro tho opoal or mo olemi mire senu nge a God ile riong nunganga aka i ritet nge mimiong aka God i sis ve aro o panes i. <sup>2</sup>Na tho opoal or venen aken, eneke te men sial ol nge mimiong aka aro ile yusonga avele. Na nomenga nge aka God i pamenu ur e rongan, God aka ile apaltet avele, i kin ile riong lale ve aro i sungu mimiong aken a it nge. <sup>3</sup>Na nge nang aka isivenga i ategal i, i patheng pat ile riong aken, aka nge panongpolong. Na God aka ini ler pamimionga i pator engeng tho, ma i sungu omaing aken a tho nge, ve aro tho panongpol nge ile panongpolong aken.

<sup>4</sup>Na tho wat malueng ake a wong a Taitus nge, na wong ini tuk nunganga, eneke ler lemioong i omole inga.

Na tho nong ve aro ong el themosaling na lemi moring a God nge ako ini Titemer tomo nge a Krais Jisas ako ini ler pamimionga.

**Tatus aro i the senu tel lamo i ategal ol lotu  
a umongare ako a mtho a Krit.**

<sup>5</sup>Na tho rialalu wong ve aro wong vothu a mtho a Krit mo aro wong pavengveng umong uluo aka i vengveng senu rongan, naro wong ategal lotu a mukalingare aka ole lemioong i motu aka a rumrem alavusnga, ranga ve aka tho ria wong nge lale. <sup>6</sup>Naro wong ategal inga tokokoe areko tokokoere o thepol ur e avele i kerenga a ole mimiong, na toko aka aro i velpol ini lotu a mukaling venen aken, aro i ewoa inga seng omole inga, na itutunre aro ole lemioong i voth mun a Krais nge, na o mothong tova ve tokokoere o apet or ve ini telnga plaingare eve or ini wainlanga areko o nongal riong avele. <sup>7</sup>Na lotu a mukalinga pomnga i pavurvur ve tokokoere aro o thepol ur e avele aka i kerenga a ile mimiong, eneke ini a God ile toko aka i theal a God ile omaing. Na i mothong tova ilemi ve ini toko pomnga aka aro i theal toko alavusnga. Na i mothong mun tova ini toko aka ilemi kling viri viri, eve i thin loptet thei engenga, eve i siso polpol tokokoere. Na e mun e aka i mothong tova ini toko aka i engeng nge umtun elnga. <sup>8</sup>Aveto aro ini toko aka i nongpoo longre. Na ini toko aka ia sagu vothung sivenga panesnga, na i panes inga lemi rumong sivenga. Naro i panes vothung vengvenga, naro i sungpot ile mimiong a God nge, naro i naktet isivenga ile mimiong. <sup>9</sup>Naro i krim engeng riong nunganga aka i pavurvur aka aro tokokoere aro o nongal senu i na olemio nge aka ranga ve te pamireal nge, mo i pavurvur aka aro i pamireal na i pator tokokoere nge pamirealing vengvenga panesnga, mo i pavurvur mun aka aro i pathengal toko le apaltetongare nge ole le apaltetong aka owo paenal nge riong nunganga aken.

**Tatus aro i pavengveng areko o panes riong le apaltetonga.**

<sup>10</sup>Na lotu a mukalinga aro i pavurvur nge tokokoere opavengvenga, eneke toko puluanga aka a mtho a Krit o pun tomo nge pamirealing vengvenga, na o nongal riong avele, na o ri riong aka imonngare avele, na o paleklek tokokoere. Na ine toko puluanga areken ini Judare aka o sis ve tokokoere aro o panes patorong aka nge toko ini peti isnga. <sup>11</sup>Naro wong mit roal or, eneke o pakerenga vel lemia pulua ole lemioong, aka nge ole pamirealing le apaltetonga aka o mothong tova o ri nge. Na pamirealonga areken ole mara avele aka o eprum inga aka ini umtun. <sup>12</sup>Na osivenga ole toko e aka ini Krit anga aka ile mire i aolonga i oma riong vene: “Ine Krit angare evelelnga ole apaltet, na o ranga ve ini mekerem wengare, na o mosal inga aka ini aning na theki namaling.” <sup>13</sup>Na riong aken i nunganga a or nge, maken aro wong vol engeng or nge ole vothung

areken, mo aro ole lemoong aro i nunganga nge pamirealing vengvenga. <sup>14</sup>Naro o modop Judare otiteviere ole rurumong pelekpolnga nongalnga, tomo mun nge patorong ako tokokoere aka o lel okime nge a God ile riong nunganga, kene osivenga o pavelpol i. <sup>15</sup>Na aro ve tokokoere o riri a God itheki lale aka nge ole lemoong nge a Jisas, aken ur pelie aka aro o an i, eve o oma i, aka ole lotu i rial or nge, kene aro i paakop or a God itheki avele. Aveto aro ve tokokoere o riri a God itheki avele, eneke ole vothung kerenga, na olemio nge a Jisas Krais avele, aken ur alavusnga aka o mothong nge annga eve o oma i mo aro o panes vothung aka ole lotu i rial or nge, kene aro i riri a God itheki avele. I nunganga, ole lemi rumong i kerenga inga, mako o pavurvur avele aka aro o ate vothung aka i kerenga. <sup>16</sup>Na osivenga o ri ve olemi mire nge a God, aveto ole vothung i pathengal i aka ve, o lel okime nge i lale. Na o nongal ile riong avele, na God i pilalpot or na o pavurvur aro o oma vothung sivenga e avele.

**Taitus aro i pamireal tolokre ome kimeitre ve  
aro o panes pamirealing vengvenga.**

**2** <sup>1</sup>Aveto wong, aro wong pamireal nge ur areko i panes pamirealing vengvenga. <sup>2</sup>Naro wong pamireal tolokre mo o naktet ole menong, naro o panes vothung vengvenga mo tokokoere o papomnga or, naro o panes inga lemi rumong sivenga, naro ole lemoong i voth engeng nge pamirealing vengvenga, naro oa sagu rintet tokokoere, naro o mit engeng nge matheong potunnga.

<sup>3</sup>Naro wong pamireal mun kimeitre mo o panes inga vothung aka God i sis ve aro o oma i. Na o mothong tova o ri tangatun, na i mothong tova thei engenga i theal ole mimiong. Aveto aro o pavurvur nge vothung sivenga patorialnga. <sup>4</sup>Naro o venen aken mo aro o tor seng apongare ve aro oa sagu oewoere na otutunre, <sup>5</sup>naro o panes inga lemi rumong sivenga, naro o voth ini seng riringare a God itheki, naro o oma senu ole omaing alavusnga aka ru a ole velre nge. Naro o oma vothung sivenga, naro o nongal oewoere ole riong. Na aro ve o oma venen aken, aro tokokoere o pavurvur aro o oma riong kerenga nge a God ile riong avele.

**Taitus ile vothung aro i patorial toko apongare  
nge vothung sivenga panesnga.**

<sup>6</sup>Naro wong pamireal mun toko apongare ve aro o panes inga lemi rumong sivenga. <sup>7</sup>Na sivengom lom omaing alavusnga aro i pathengal vothung sivenga a or nge mo o panes i. Na nge lom pamirealing alavusnga, mothong tova patho tomo i nge asisaling na ri posililaling. <sup>8</sup>Naro wong ri riong vengvenga inga aka tokokoere o pavurvur aro o ri riong kerenga e avele nge, mo aka aro ler ngarangre ole maral, eneke o pavurvur aro o oma riong kerenga e avele a it nge.

**Toko um polpolongare aro o nongal otokoningare ole riong.**

<sup>9</sup>Naro wong tor toko um polpolongare ve aro o nongal inga otokoningare ole riong, na nge ole umong alavusnga, aro o palemi senu otokoningare nge. Na o mothong tova o wathalal ole riong, <sup>10</sup>eve o kem ole ur elonga. Aveto aro o pathengal i ako ve, ole omaing alavusnga i vengvenget inga, aken tokokoere aro o thepol ole omaing elonga, naro o papomnga a God ako ini ler pamimionga ile pamirealing vengvenga.

**Aro te mimi ranga ve aka God i sis ve aro te oma i.**

<sup>11</sup>Naro wong pamireal toko lemioongare venen aken, eneke God ile themosaling a it nge, kene ini Itun aka i pakeu i a it nge me lale, mo aro i el werer toko alavusnga nge i. <sup>12</sup>Na i pamireal it ve aro te modop vothung aka God ilemi i sivenga nge avele, tomo mun nge vothung ulue anga areko i mita a lemir me. Na i pamireal it ve aro te panes inga lemi rumong sivenga, na vothung vengvenga, na vothung aka God i sis ve aro te oma i, nge ler mimiong elonga aka te voth nge ake ru a ulue. <sup>13</sup>Naro te mimi venen aken, nge aka te men sial nge ur sivenga aka aro i palemi senu rintet it nge, aka ini a Jisas Krais ile velpoling tomo nge ile tolilisong aka aro i sivenga rintet. Na i kene ini ler God aka i aolonga rintet, na ini ler pamimionga mun. <sup>14</sup>Na i sungpot isivenga ile mimiong mo i opoal it, na i ol wererpot it nge ler vothung kerenga alavusnga, mo i oma it mo te voth ini isivenga ile toko riringare, aka te engeng nge vothung sivenga omanga.

<sup>15</sup>Naro wong pamireal tokokoere nge ur areko tho ri nge lale. Naro wong paengeng na pavengveng tokokoere nge lom engenging alavusnga aka God i sungu i a wong nge, nge othealnga. Naro ong mothong tova som womo or mo olemi ve lom omaing aken ini ur polpolnga.

**Vothung sivenga aka aro te oma i.**

**3** <sup>1</sup>Naro wong palemi rum toko lemioongare ve aro o voth a gavman a mukalingare osa thewo, naro o nongal ole riong. Na evelelnga aro o monsi nge omaing sivenga elonga omanga. <sup>2</sup>Naro o mothong tova o voltet toko e, na o mothong tova o kelelal pel. Aveto aro o nak ole menong, na o oma inga vothung sivenga a toko alavusngare nge.

<sup>3</sup>Eneke nomenga sivenger mun ler vothung i ranga ve aka lemir mire nge a Krais avele, na te nongal riong avele, mako te lelek. Na i ranga ve aka te velpol ini toko um polpolonga nge lemi rumong kerenga kathnga aka i mita a lemir me, tomo mun nge vothung kerenga aka te sis ve aro te oma i. Na ler mimiong aken i vual nge vothung kerenga omanga, na te theseal tokokoere ole ur elonga. Na te oma tokokoere mo oni silal it ma nir silal pel. <sup>4</sup>Aveto God aka ini ler pamimionga, ia sagu rintet it, na i oma vothung

sivenga a it nge. Ma nge nang ako ile vothung aken i velpol ol a pen lalanga 5 i pamimi it. Na i pamimi it nge ler vothung vengvenga aka sivenger te oma i, kene avele. Aveto nge isivenga ile themosaling inga, mako i pamimi it nge sovengalo aka i pariri it nge. Na i pakeu Ioni Riringa mo i pavelpol mimiong ponganga a it nge, mo te onol mo te velpol ini ile toko ponganga ol re. 6 Na i odoroktun it nge Ioni Riringa, aka nge a Jisas Krais aka ini ler pamimionga ile omaing, mo i um engeng a lemire. 7 Na God i themosal it venen aken, make te velpol ini toko vengvengare a itheki lale, mo te men tetal ol inga mimiong aka aro ile vusonga avele aka i kin ile riong nge ve aro i sungu i a it nge. 8 Na riong alavusnga areke ru tho ri nge kene i nunganga, na i pavurvur aka aro tokokoere aro o nongal senu i na olemio nge.

Na tho sis ve aro wong pesrou nge ur areke pamirealnga avele, mo tokokoe areko olemio nge a God, evelelnga aro o betet nge vothung sivenga omanga.

Na pamirealing areken i sivenga rintet, naro i opoal tokokoere. 9 Aveto aro wong voth mela nge areko o pun pel e riong aka imonnga avele, ranga ve aka o pun rum pel nge otiteviere oionre, na o wathalal pel nge riong, na o vol pel nge Judare ole patorongre. Naro wong voth mela nge or, eneke ur areko i venen aken, i pavurvur aro i opoal tokokoere avele, na ini ur polpolnga inga. 10 Na aro ve toko e i oma vothung aka i omreu lotuongare, aro wong tor ile mo i modopu i. Na aro ve i nongal avele, aro wong tor werer mun ile paininga. Na eve i nongal ol avele, aro wong mothonglelu ol i, 11 eneke lomum mire ol aka ve, toko aka i venen aken i leklek lale, na i oma vothung kerenga. Na nge ile avsaing aken, isivenga i pavelpol a God ile paomelaling a i nge.

### Pol ile riong patopalalnga.

12 Nge nang aka aro tho pake a Artemas eve Tikikus mo i es a wong nge wot mo i el meum, akennga aro wong um engeng vet mo wong velpol a tho nge aka a Nikopolis, eneke lemik i ngo lale ve aro tho voth nge, i pavurvur nge theu po ile vusong. 13 Na Apolos tomo nge a Senas aka ini toko aka ile mire i aolonga nge patorongre, aro ve o monsi lale, aro wong opoal engeng or paini nge ole esong mo o oror nge ur e avele. 14 Na ler toko lemioongare aro olemi mire mun aka ve, aro o betet nge vothung sivenga omanga aka nge areko o oror rintet nge ur elonga, oopoalnga. Aro vene mo ole mimiong aken imonnga avele.

15 Ine tokokoe areko o voth tomo nge tho o pasungalu ole nang sivenga a wong nge wot. Naro wong ria mun areko olemio nge a Jisas na oa sagu them ve, them pasungalu lemem nang sivenga a or nge.

Na tho nong ve aro God ile themosaling aro i voth tomo nge thomu alavusnga.

Na i re aken. I vus.